

SCHÖN ISCH ES GSI U DRUM TUE IG Ä RÜCKBLICK MACHE  
MIR HEI VIEU GSEH, GÄSSE, TRUNKE, DISKUTIERT U GLACHET

DER SANDRO ISCH SUPER GFAHRE, FIN, RUEHIG U OHNI ZFLUECHE  
Ä SETTIGE CHAUFFEUR MUESCH DE WIT GA SUECHE

MÄNGS GSCHICHTLI U DETAIL HEI MIR VO IHM DÖRFE ERFAHRE  
TROTZ Siner BRICHTE ISCH ÄR SICHER DÜR STADT U LAND GFAHRE

DER ERSCHT ZNÜNIHAUT HETS GÄH AM GÄNFERSEE  
JEDEM ÄS GIPFELI U DERZUE ÄS CHACHELI KAFFEE

WITER ÜBERE GROSS ST. BÄRNHARD IDS AOSTA TAU  
Ä BLICK NACH LINKS Ä BLICK NACH RÄCHTS ÄS ISCH GENIAU

ZUM ZMITTAG HEI MIR DÖRFE VERSCHIDENI RISOTTO ÄSSE  
AM CHOCH ZUE LUEGE, DAS WÄRDE MIR NID SO SCHNÄU VERGÄSSE

DI FROU IR RISFARM HET GUET U USFÜEHRICH CHÖNNE BRICHTE  
VOM RIS ABU FRÜECHER U HÜT U MÄNG ANGERI GSCHICHTE

GÄGE ABE ISCHS I ÜSES HOTÄU NACH ALBA GANGE  
CHLI MIT VERSPÄTIG, WIEU MIR MÄNGISCH HAUT CHLI SI BLIBE HANGE

AM ABE ISCHS IM FREIE USGANG IR STADT ALBA LUSCHTIG GSI  
PIZZA MIT CRÖVETTE, DESSÄR, KAFI U ÖPPE NO CHLI WII

Ä BSUECH UFEM LUNA-PARK DAS HET MÜESS SI  
TROTZ DE GFÜLLTE MÄGE U DAM VILE WII

HIN U HÄR, OBSI U NITSI WIE DER BLITZ  
ABER OH JE, Z' HÖRGRÄT VERLORE HET DR FRITZ

AM MORGE HET ÖPPER DI GUETI NACHRICHT ÜBERBRUNGE  
DAS HÖRGRÄT HEI SI DE DOCH NO GFUNGE

CHUNNT ÄS FROUELI IM MINISCHÜPLI GSCHTÖGELIG DARHÄR  
Z'LOUFE  
DI HÄT ÄUÄ GSCHIDER ÄS PAAR ABSATZLOSI SCHUEH SÖUE  
CHOUFE

IG GLOUBE DIE HET SOGAR NO STÖPSLE I DE OHRE  
HAUSI SEIT: DI HET DOCH HINGER LINKGS ÄS ISE VERLORE

AM SAMSCHTIG MORGE HET ME CHÖNNE ÜBERE MÄRIT LOUFE  
GA LUEGE ÖB ME AMÄND OPPIS CHÖNNTI CHOUFE

RÖCK, HANDTÄSCHE, SCHUEH, BLUSE MIT ODER OHNI CHRAGE  
DA HET DE FROUE Z'HÄRZLI HÖCHER GSCHLAGE

MIT ÄM SÄM ETTER SI MIR DE NACH CALASSO GFAHRE  
VO IHM HEI MIR MÄNGS ÜBERE WII DÖRFE ERFAHRE

D' USSICHT BI DÄM SCHÖNE WÄTTER ISCH SUPER GSI  
U «SOWEIT DAS AUGER REICHT» DI TRUBE FÜR DÄ GUET WII

DER SÄM DÄ HET ÄS WÜSSE DÄ ISCH MIT LIB U SEEU WII-BUR  
ÄS ISCH MIR MIT SINE USFÜEHRIGE VORCHO WIE DER HERR  
LATOUR

ÜBER MOUCHE, MÄIE, WÖUF, REH U BAROLO, MUSCATO U NO  
BARBARESCO  
MI HET SECH MÜESSE KONZENTRIERE DAS ME KES DÜRENANG  
HET ÜBERCHO

ZMITTAG IM RESTOURANT CROTA HETS GÄ ÄS GUETS ÄSSE  
WII, FLEISCH-TARTAR, TAGLIATELLE U DER RISOTTO NID VER-  
GÄSSE

WO MIR NACH DÄM GUETE ÄSSE WIDER HEI ZÄME GFUNGE  
HEI MIR AM SÄM NO ZWÖI SCHÖNI LIEDER GSUNGE

SO MIR MÜESSE ZRUGG IDS HOTÄU, ES ISCH ZWAR NID SO WIT  
ABER WE MIR ÜS VOREM NACHTÄSSE, NO CHLI WIE ERHOLE, DE  
ISCHES ITZ ZYT

AM ZÄH VOR SIBNI ISCH ME GSCHTARTET NACH RODELLO  
ME HET DU GLICH SCHO WIDER ÄS HÜNGERLI ÜBERCHO

VORSPIS, WII, WASSER MIT U OHNI CHOLESÜRI  
ÄS ISCH BLITZARTIG VORWÄRTS GANGE - MITÜRI

TEIGTÄSCHE MIT SPARGLE, RAVIOLI U SPAGHETTI MIT TRÜFFUBITZLI  
ZWÜSCHE DÜRE CHUM POUSE FÜR Z'VERZEUE ÄS WITZLI

VOREM DESSÄR NO HÄRDÖPFU, FLEISCH U MEIS  
U DE HET SECH GSCHLOSSE DER MÖNUE KREIS

SO LÖT ÖICH NO EINISCH ZUECHE  
ITZ GITS NO PIEMONTESSISCHE CHUECHE

NACHEM KAFI HEI MIT DAS ÄSSE GSCHAFT  
Z'LETSCHT UF AUS UECHEN NO Ä HASU-NUSS-SAFT

SANDRO HÄB BIM ZRUGG FAHRE GOTTVERTROUE  
DE MIR HEI DAS GROSSE ÄSSE NO NID CHÖNNE VERDOUE

CHUGELI RUND SI MIR IDS BETT GA LIGE  
HOFFENTLICH ISCH AUNE DAS ÄSSE IM MAGE BLIBE

VOM SUNNTIG GITS NÜM SO VIEU Z'BRICHTE  
ÄS WIRD SCHWIRIG NO ÖPPIS ZÄME Z'DICHTE

DER HEINZ U D'MARIA DI SI NÜM MIT ÜS CHO  
SI HEI NO ÄS REISLI I SÜDE UNGERNO

DI FEINE ÖPFU HET DER HEINZ BRUNGE US SIR PLANTAGE  
U DAS FREIWILLIG U OHNI GASCHEN

ÄR PIA SÄGE MIR FÜR DIE GÜEZI O DANKE  
FEIN SI SI GSI MIT SO VIEU ANKE

D'USSICHT VO LA MORRA ISCH TROTZ AM TRÜEBE WÄTTER Ä GNUSS  
DRUM CHUME IG LANGSAM ZUM SCHLUSS

Ä MITTAGSHAUT IN AOSTA U UF DER OUTOBAHN Ä POUSE  
BEIDNE ORTE HETS ÖPPIS GÄ ZUM SCHNOUSE

IN AOSTA HETS SOGAR Ä FOODSTREET GÄH  
DERT HET SICHER JEDES ÖPPIS CHÖNNE ZUE SECH NÄH

ÄNDLICH HET ME HIE NACH DREI TAG Ä GELATI ÜBER CHO  
MI HET DRUM DE GRAD Ä XXL PORTION ZUE SECH GNO

WIU MIR D'NUSSFARM HÜT ZYTTLICH HEI USSE GLA  
HEI MIR NÜSS ORGANISIERT WO JEDES ZUM GNIESSE DARF HA

SO... Ä HÄRZLICHE DANK GIEUT ÜSEM SANDRO U AM CAR-UNGER-  
NÄHME SUMMER  
DE MIT DENE CHAME REISE OHNI CHUMMER

MIR TÜE ÖICH PER GLÄGEHEIT NO RÄCHNIG STEUE  
DE CHÖI MIR DER NO CHLI ÜBER DI REIS VERZEUE

D'MARLIES U IG HOFFE DASES ÖICH GFAUE HET  
U TRÖIMET HINECH NO CHLI I ÖIEM HEIMELIGE BETT

Michu Friederich